



Gabinete Wever - Croes II



ISLAONLINE


Noticia di Gobierno

2023

Diamars 21 Maart 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



RELATO ANUAL 2022 DI MINISTERIO DI PROME MINISTER A WORDO PUBLICA

Por download y lesa e Relato Anual riba e plataformanan menciona

Dialuna mainta durante conferencia di prensa di Gobierno di Aruba, Prome Minister Evelyn Wever-Croes a anuncia cu e Relato Anual 2022 di su ministerio a wordo publica. Prome Minister a splica e contenido di cada capitulo. E prome capitulo ta contene un relato amplio di relacionnan den Reino, relacionnan exterior, SDG's, genero, seguridad nacional, Proyecto Veiligheidshuis, calamidad, crisisnan cu tawata presente den 2022 entre otro Covid y e problematica humanitario na Venezuela cu a causa cu na Aruba nos tin problematica di asilo, comunicacion y e diferente comisionnan cu e ministerio ta atende cu ne.

Den e capitulo aki tambe, Prome Minister ta compara e gastonan di su ministerio cu e ministerio di e Prome Minister anterior, señor Eman. Aña 2022 a cera cu un total di 23 persona cu ta traha pa su ministerio mientras cu señor Eman a traha cu un total di 144 persona den su ministerio. Un diferencia di 124 persona y 9 milyon florin. Y e averahe aki tambe, Ministerio di Asuntonan General a spaar durante 5 aña door di baha gasto, y simplemente door di cambia e Prome Minister di nos pais pa un Prome Minister actual cu ta responsabel, a spaar nos pais 45 milyon florin te cu awo. Den e relato por nota tambe e comparacion entre e dos ministerionan den cifra pa loke ta trata e gastonan di biahe, promocion, mercadeo, leasemento di auto na unda cu cifranan ta indica cu gastonan di e ministerio di Wever-Croes tawata hopi menos compara cu esunnan di señor Eman.

Den e capitulo 2, Innovacion, ta duna relato di Directie voor Innovatie, un departamento nobo cu lo percura pa innovacion, ta duna relato di e trabounan grandi cu a wordo haci na Directie Informatievoorziening en Automatisering (DIA) y tambe un relato sumamente extenso di e trabounan di Futura riba tereno di innovacion.

Den e capitulo di Organisacion Gubernamental, ta cuminsa cu Departamento di Recurso Humano na unda cu tin varios tabel cu ta indica con e cantidad di empleado publico a baha desde cu Gabinete Wever-Croes a drenta den gobernacion. Ta menciona tambe e motibo pa cua e cantidad a baha. Ta



papiando di reduccion substancial y ta wordo muestra cu cifras. Na 2017 e cantidad tawata mas o menos 4.800 persona y awo e cantidad ta na 4.400 persona. 400 persona menos ekivalente na un reduccion di 9%. Esaki ta danki na e maneho Beleidsplan Verlaging personeelskosten cu a aplica. Tambe ta menciona tocante e maneho di Vut. Tambe capitulo 3 ta menciona meneho di Bureau Interne Diensten (BID), CENSO, MFA, Hulpbestuurskantoor.

Den e capitulo di Infrastructura y Planificacion Teritorial, ta duna relato amplio poniendo den tur transparencia cifranan corecto y actual di e departamentonan cu ta resorta bou di e ministerio aki y e trabounan cu nan a haci pa genera placa. Esakinan ta e departamentonan Directie Infrastructuur en Planning (DIP), Dienst Landmeetkunde en Vastgoedregistratie (DLV) of Cadaster, Dienst Openbare Werken (DOW) y Dienst Technische Inspecties (DTI).

E relato anual ta finalisa cu un bista riba 2023 (Vooruitblik 2023) na unda cu ta indica kico ta spera pa aña 2023.

Relato Anual 2022 ta accesibel pa pueblo riba e website 'Prime Minister's Office' pmo.arubagov.org. Riba e Plataforma ISSUU na unda por download e y tambe por click e link riba pagina di Facebook di Gabinete Wever-Croes pa yega na e relato anual. Tambe, e lo bay Biblioteca Nacional y e lo wordo registra na BUVO. Esaki, pa asina e ta accesibel tur caminda pa pueblo por tuma nota di dje.

PROME MINISTER A FELICITA TRAHADONAN DI INMIGRACION PA E TRABOU IMPORTANTE CU NAN TA EHERCE

Den cuadro di cumplimento di 54 aniversario



Recientemente Prome Minister a atende celebracion di 54 aniversario di Inmigracion Aruba. Prome Minister Evelyn Wever - Croes den nomber di Gobierno di Aruba a felicita tur esnan cu ta traha na e departamento y gradici nan pa e tremendo trabou cu nan ta haci.

Trabou di inmigracion no ta facil, esnan cu ta traha na inmigracion ta haya nan mes entre otro cu casonan humanitario hopi dificil pa atende y esaki ta pone un presion extra grandi riba nan trabou. Durante un encuentro amento conhuntamente cu stakeholders, Prome Minister Wever - Croes a gradici e trahadonan pa e papel importante cu nan a hunga tempo di pandemia, specialmente ora a habri frontera bek.

“Danki Dios nan tabata bon prepara y bon ekipa y cu nan tabata dispuesto pa haci e trabou y awoki ta mira cu poco poco Aruba ta recuperando na e manera cu ta recuperando.”

Prome Minister a sigui splica cu na e ocasion tambe a toca e tema di organisacion y reorganisacion y e proximo reapertura di fronteranan maritimo cu Venezuela cu tambe ta pone presion riba nan trabou. Teniendo tur esaki na mente, Premier Wever - Croes a expresa cu ta contento cu por celebra conmemora y principalmente hunto por sigui enfrenta retonan cu tin dilanti.

“Pabien na e director di Inmigracion Aruba sr. Andrew Hoo y tur esnan cu ta labora na inmigracion pa e trabou cu ta haci.”



Prome Minister Evelyn Wever-Croes:

GASTONAN DI OFICINA DI PROME MINISTER
WEVER-CROES TA 9 MIYON FLORIN PA AÑA
MAS ABOU CU E GASTONAN DI EX-PROME
MINISTER EMAN



Dialuna mainta dia 20 di maart, Prome Minister Evelyn Wever-Croes a publica su relato anual di su ministerio pa aña 2022. Den e relato annual, riba pagina 31, tin e relato di gastonan di oficina di Prome Minister na unda cu ta indica cu cifranan concreto cu e gastonan di Prome Minister Wever-Croes ta 9 miyon florin pa aña mas abou cu e gastonan di ex-prome minister Eman.

PERSONAL:

Den e acuerdo di gobernacion desde Gabinete Wever-Croes I, a palabra cu Gobierno di Gabinete Wever-Croes lo traha cu menos personal cu e cantidad di personal cu tawata tin den e Gabinetenan Eman di AVP. Gabinetenan Eman no tawata tin un maximo di personal y cierto momento, ex prome minister Mike Eman na final di su periodo tawata tin 147 persona trahando p’e. Pa Gabinete Wever-Croes I esaki a wordo considera un abuso y a palabra na 2017 cu cada ministerio ta traha cu un maximo di 25 persona. E e palabracion aki a continua den Gabinete Wever-Croes II.

SALARIO:

Na fin di 2022, e oficina di Minister President Wever-Croes tawata conta cu 23 persona cu ta henter e ekipo cu ta traha na e oficina aki cu ta inclui, siguridad, chauffeur, secretarianan, personal di limpieza, personal administrativo, consehero, vocero. Tur segun e organogram cu ta aproba door di Departamento di Recurso Humano.

Prome Minister: “Claro cu e cantidad aki no ta suficiente pa haci tur e trabou cu mester wordo haci. Y manera tur otro caminda den sector publico, mi oficina tambe tin falta di mas personal, pero mi personal ta traha duro pa e trabou wordo haci cu eficiencia”.

Si compara e cantidad aki cu e oficina di e ex prome minister Eman di AVP, e diferencia ta 124 persona menos y 9 miyon florin menos, 80% menos. Si conta e 5 añanan di Prome Minister Wever-Croes, esaki ta un reduccion di gasto di 45 miyon florin.

Tambe tin otro gastonan di mandatario Wever-Croes y ex mandatario Eman. Entre otro gastonan di biahe, promocion y mercadeo, di lease auto. E diferencia di esakinan ta casi 1 miyon florin entre e Prome Minister actual y e ex prome minister Eman, asina mes teniendo cuenta cu tur prijs a subi den e 5 añanan aki di Wever-Croes. Den total, maneho di Prome Minister Evelyn Wever-Croes den averahe ta scapa pais Aruba 10 miyon florin pa aña desde 2017. Apesar cu tawata 5 aña hopi pisa, mester bisa si cu ta remarcabel cu Prome Minister Wever-Croes, cu menos hende, menos presupuesto a logra hopi mas cu e ex prome minister di AVP.

BUREAU MINPRES	EMAN 2017	WEVER-CROES 2022	VERSCHIL	%
Aantal medewerkers	147	23	-124	
Totale salariskosten	11.323.300,00	2.273.366,00	-9.049.934,00	-80%

	2017	2022	VERSCHIL	%
Reis- en Verblijfskosten	155.400,00	123.061,00		
Voorlichting en Promotie	1.008.600,00	124.417,00		
Lease voertuigen	58.500,00	24.096,00		
TOTAAL	1.222.500,00	271.574,00	-950.926,00	-78%



ARUBA TA PARTICIPANDO NA E UN WATER CONFERENCE 2023

Durante e siman di 22 pa 24 maart 2023, delegacion di Aruba lo ta representando nos naturalesa na New York durante e conferencia di awa. E aña aki e United Nations Water Conference a wordo co-organisa door di Hulanda conhuntamente cu Republica di Tajikistan.

E meta di e conferencia ta pa trece stakeholders di diferente sector pa hunto acelera e implementacion y mehora e impacto di e retonan relatando na awa na mundo. E tres principian cu lo guia e conferencia ta inclusividad, tuma accion y intersectorial.

Di awa nos ta biba, e ta un recurso esencial cu ta crucial pa e bienestar di hende, produccion di energia y alimento, un ecosistema saludabel, adaptacion di clima, e reduccion di pobresa y mucho mas. Awa ta central ora ta papia di desaroyo sostenibel, pero contaminacion y uzo excesivo di nos recurso di awa a bin cu efectonan negativo pa e salud di hende y actividadnan economico. Acceso na awa limpi ta un derecho humano basico y asina mes tin miyones di personanan rond mundo cu ainda no tin acceso na esaki. Ta rekeri accion urgente pa garantisar un distribuimento sostenibel di awa pa tur necesidad basico di e ser humano.

Na Aruba loke nos tin cu corda ta cu nos recurso di awa ta nos oceano, e oceano cu no solamente ta rondona nos pero e awa di lama cu ta conecta cu ful mundo tambe. P'esey ta importante pa tin conocimiento di e desafionan cu otro paisnan ta enfrenta cune y tambe fomenta colaboracion specialmente entre e islanan den Caribe. Asina por tuma accionnan responsabel y trece solucionnan sostenibel cu ta tene consideracion cu nos naturalesa.

Minister Ursell Arends, encarga cu Naturalesa hunto cu Prome Minister Evelyn Wever-Croes lo ta participando na diferente di e sesionnan unda lo enfatisa riba e compromisonan cu Aruba a propone pa loke trata e Metanan di Desaroyo Sostenibel (SDG's).





Xiomara Maduro
MINISTER

Bou direccion di e talentoso artista local Chris Kross PUBLICO A DISFRUTA DI UN CONCIERTO UNICO DURANTE E MANIFESTACION CULTURAL

E Manifestacion Cultural di diabierna ultimo a conta cu un concierto cu repertorio amplio di canto y baile na honor di nos Dia di Himno y Bandera. E concierto tabata den man di un orkestra bou direccion di e talentoso artista local Chris Kross. Publico a disfruta di un anochi yena cu musica produci y presenta pa nos artistanan local, cu a rindi honor na nos dia nacional.

‘Danki na cada un cantante, bailarin, musico y tur esnan cu di un of otro forma a contribui cu e presentacion di e anochi di e Manifestacion Cultural na honor di Dia di Himno y Bandera. Un danki special ta bay pa Chris Kross cu a dirigi e concierto unici aki y a sa di duna, hunto cu demas artista, un presentacion digno pa celebra nos Pais Aruba,’ tabata palabra di e mandatario na final di e anochi aki.

Minister di Cultura, Xiomara Maduro, den nomber di Gobierno di Aruba, ta gradici tur esnan cu a subi tarima di Plaza Libertador Betico Croes pa duna homenahe y rindi honor na nos Himno y Bandera. ‘Danki pa engrandece nos cultura atraves di boso arte y danki pa stima nos Pais’ e mandatario ta finalisa bisando.





POTRETNAN DI
MANIFESTACION
CULTURAL





UN SIMAN HOPI ACTIVO, PRODUCTIVO Y FESTIVO TRAS DI LOMBA



Siman pasa Minister di Turismo y Salud Publico tabata tin un siman hopi activo y productivo. Esaki tabata e siman di nos celebracion di himno y bandera unda a habri e siman cu un bishita hopi ameno y placentero na Scol Basico Washington. Esaki tabata un experiencia hopi bunita di mira e alegria y positivismo cu ta reina den e alumnonan y e docentenan.

Tambe a reuni cu sr. Paul Bekkers cu ta e representante permanente di Nacionnan Uni y otro organisacionnan internacional na Ginebra, Suisa. Durante e encuentro aki Minister Oduber a splica su maneho y vision y tambe splica kiko tur e ta haciendo riba e tereno di turismo y salud publico.

Diamars mainta Minister Oduber conhuntamente cu Director di Aruba Ports Authority (APA) sr. Marc Figaroa y CEO di Aruba Tourism Authority (ATA) sra. Ronella Croes a cana den e ex edificio di DOW na playa. E ex edificio di DOW ya caba tin 14 aña bandona y ta un bista menos agradabel pa nos bishitantenan cu ta baha for di crucero.

Despues di esaki a tene un conferencia di prensa caminda e mandatario a splica cu ta bay haci un inversion por medio di APA pa tuma e edificio di DOW over y renoba esaki completo. Como esaki ta un edificio basta grandi ta bay comparti e edificio aki cu Aruba Tourism Authority (ATA). Ta bay converti un parti di e edificio aki den un Visitor Information Center (VIC) ultra



moderno pa brinda informacion na nos bishitantenan. Minister a menciona cu pronto lo bay firma un MOU entre Ministerio di Turismo y Salud Publico, APA, ATA, DOW y Monumenten bureau pa haci e traspaso aki posibel.

Diabierna anochi a presencia e manifestacion cultural caminda hopi Arubiano a haña e oportunidad pa mostra nan talento y nan amor pa Aruba, durante varios show cu a wordo presenta na e publico grandi. E publico a wordo deleita cu baile, musica, entretenimento y tambe poema.

Diasabra mainta, 18 di maart tawata tin e actonan protocolario riba Plaza Betico Croes cu presencia di nos Gobernador Sr. Alfonso Boekhoudt y tur e mandatarionan y parlamentarionan di Aruba. Tambe tawata tin e desfile di gruponan uniforma y scouts. Sigur un mainta bunita pa mira e desfile aki di nos muchanan cu hopi animo y energia. Minister ta gradici e Comision Celebracion Dianan Nacional cu a organisa e manifestacion cultural y tambe e celebracion di e actonan protocolario.

Aruba por mira atras riba un weekend di celebracion grandi y nos ta contento di por mira Aruba celebra pasobra nos tur ta orguyoso di a nace riba e pida baranca aki cu nos ta yama Aruba.



A HACI ENTREGA DI E PROME CARGA DI BULLETPROOF VEST NA CUERPO POLICIAL DI ARUBA



Dialuna merdia, Minister di Husticia y Asuntonan Social Sr. Rocco Tjon, hunto cu Korpschef Sr. Ramon Arnhem, a haci entrega simbolicamente na coleganan di Cuerpo Policial pa loke ta e bulletproof vestnan. E prome carga di alrededor di 200 vest a yega Aruba, y den e dianan nos dilanti e departamento di bedrijfsvoering di Cuerpo Policial lo zorg pa entrega esakinan debidamente na e ekipo.

Manera ta conoci, aña pasa den lunanan di juli y augustus, a tuma e midi di e coleganan pa asina por haci e pedido di e vestnan, y na mes momento a aloca e fondonan necesario pa percursu cu por financia e vestnan pa esakinan por a wordo fabrica, y finalmente e dia a yega pa entrega esakinan na Cuerpo Policial. Segun e Mandatario, e ta un deber di nos como dunado di trabou pa percursu cu tur colega por tin e materialnan necesario pa garantisar nan siguridat na prome luga, pero tambe pa nan por ehersa nan tareanan na un manera eficiente y eficaz, pa asina brinda un bon servicio na e pueblo di Aruba.

Den e dianan tras di lomba, a haci bishitanan na diferente wardanan di polis, caminda a tene varios combersacion cu coleganan, entre otro tocante e proyecto di bulletproof vest, cual a indica na nan na maart e entrega di e vestnan lo tuma luga. Banda di esaki a toca diferente otro proyecto cu tin na caminda, entre otro e introduccion di metodonan nobo pa nan por ehersa nan trabou mucho mas miho, manera bodycameras, cual lo yega Aruba na final di april, cual na un forma piloto lo wordo introduci na Cuerpo Policial.

Por ultimo, Minister Tjon a indica cu e ta sumamente satisfecho cu e entrega di e bulletproof vestnan y a indica cu di e forma aki lo sigui traha cu Alto Mando como tambe Sindicato di Polis, pa asina percursu cu e ekipo di Cuerpo Policial por haya e recursonan cu nan tin mester di dje pa por ehersa nan trabounan debidamente.



MINISTER ENDY CROES TA FELICITA E ATLETANAN DI DAM Y SCHAAK CU NAN EXCELENTE PRESTACION NA WEGANAN ESCOLAR INTERINSULAR 2023

Despues di shete aña Weganan Interinsular entre e scolnan di Aruba, Boneiro y Curaçao ta tumando luga bek. Minister Endy Croes a indica cu hunto cu colega Minister di Enseñansa, Ciencia, Cultura y Deporte di Curaçao Sithree van Heydoorn y Diputado di Infraestructura y Deporte di Boneiro James Kroon a traha hopi duro pa cuminsa cu Weganan Interinsular bek, aña pasa den e luna di september a firma un acuerdo cu hunto lo trece Weganan Escolar Interinsular bek. Minister Endy Croes ta expresa cu e ta hopi orguyoso di e 16 atletanan di diferente scol di Aruba cu a bay participa den e Weganan Interinsular na Boneiro y a trece diferente medaya di oro, plata y brons.



Di e 12 medayanan cu tabatin Aruba a logra conquista 6 medaya: den e disciplina di dam: 1 oro, 1 plata y 1 brons. Den e deporte di schaak: 2 plata y 1 brons.

Minister Endy Croes ta felicita e hobennan y ta gradicinan pa laga Aruba su nomber briya den exterior. Alabes e mandatario di Deporte ta manda palabra di pabien na IBiSA, Indebon di Boneiro y FDDK di Curaçao cu ta esnan cu a prepara e Weganan Interinsular.

Weganan Escolar InterInsular 2023, ta continua e fin di siman aki na Curaçao, unda e hobennan ta participa den e disciplina di atletismo y trefbal. E clausura ta bay ta bay tuma luga na Aruba den e luna di april proximo. Ministerio di Deporte hunto cu IBiSA ta encarga pa e evento aki y lo prepara un show bunita pa e pueblo di Aruba y pa e bishitantenan di Curaçao y Boneiro cu ta bay ta akinan durante e clausura di Weganan Interinsular.

Aruba a logra e siguiente premionan:

Dam:

Mucha muhe di 2 luga:

Jaylee Krozendijk di Colegio Conrado Coronel

Mucha homber 1 luga:

Xyon Jacobs di Colegio San Hose

Mucha homber 3 luga:

Elion Istatia di Colegio Conrado Coronel

Schaak:

Mucha muhe 2 luga:

Sylvi Cabral di De Schakel

Mucha homber 2 luga:

Mohit Sharma di S.P. Kudawecha

Mucha homber 3 luga:

Lui Montoya di Mon Plaisir MAVO

EN CONEXION CU DIA DI HIMNO Y BANDERA, MINISTER ENDY CROES A BISHITA PLAZA STATUS APARTE

Diasabra, en conexion cu Dia di Himno y Bandera, Minister Endy Croes a bishita Plaza Status Aparte, banda di e retonde di Santa Cruz, unda tin situa e statua di Libertador Betico Croes.

Manera tur aña, tabatin un tremendo ambiente cu un cantidad di tent di cuminda y entretenimento di DJ Andy Willems. Minister Endy Croes a pasa un tempo ameno cu e ciudadanonan presente celebrando Dia di Himno y Bandera.



MINISTER ENDY CROES A BISHITA BIBLIOTECA NACIONAL ARUBA PA E CELEBRACION DI DIA DI HIMNO Y BANDERA



Diasabra mainta, despues di atende Acto Protocolario na Plaza Libertador Betico Croes, Minister Endy Croes hunto cu su kerida esposa, Dilailah Croes, a bishita Biblioteca Nacional Aruba (BNA) pa e celebracion di Dia di Himno y Bandera. Tabatin diferente tent di cuminda, bocadushi, artesenia y mata. Banda di esaki, tabatin un sala specialmente pa bendemento di buki.



Tambe, tabatin un espacio unda e muchanan por hunga (kids corner), mientras cu e mayornan ta haci compras. Fuera di esaki, tabatin diferente banda crioyo poniendo ambiente parti paden di BNA. Un ambiente total den acompaño di empleado, miembro y ciudadanonan di nos comunidad. Minister Endy Croes ta felicita directora di Biblioteca Nacional Aruba, Sra. Astrid Britten y team completo cu a organisa e evento aki y asina sigui cultiva cultura di nos dushi Aruba.



MINISTER ENDY CROES A ATENDE AWARDS NIGHT NIGHT DI PROLINE BASEBALL ARUBA

Recientemente, Minister Endy Croes a atende Awards Night di Proline Baseball Aruba na Boulevard Events. Proline Baseball Aruba a organisa un campeonato cu un estilo nobo, unda a “draft” tur hungado desde inicio, a scoge cuater manager y “coaching staff” pa traha cuater ekipo bon balansa. E ekipo di Poy Flanegin di Santa Cruz a gana e titulo maximo di e campeonato.

Despues di e prome edicion di e campeonato exitoso aki, Proline Baseball Aruba a organisa un Awards Night dia 13 di maart 2023, unda a reconoce e hungadonan cu mas a destaca. E nomidadonan tabata parti den categoria, entre otro, pitcher, catcher, prome base, segunda base y tercera base. Minister Endy Croes ta manda un palabra di fecitacion na Sr. Kevin James y henter e comision Proline Baseball Aruba cu e tremendo evento cu nan a organisa, alabes ta manda un palabra di pabien na e nomidado- y ganadonan.



DIA INTERNACIONAL DI MONDI 2023 CU MENSAHE "MONDI SALUDABEL PA HENDE SALUDABEL"

Asamblea General di Nacionnan Uni a proclama dia 21 di maart como Dia Internacional di Mond. E dia aki ta pa celebra y amplia conocimiento di e importancia di tur tipo di mondi. Na Papiamentu ta defini un mondi como un area cu hopi mata cu hende no a planta. Na Ingles nan ta yama un area asina aki forest. E definicion di forest ta un area of tereno na unda mata ta predomina sin intervencion di hende. Algun característica di mondi ta e.o. e concentracion di mata den cantidad halto, e haltura di e matanan, su balor den uzo y area y su funcion ecologico.

Localmente nos mondinan tin nan importancia y ta brinda nan serviccionan. Mundialmente e serviccionan aki ta multiplica y asina brinda mundo henter mas ainda. Ta solamente si e mondinan aki ta den un estado saludabel nan lo por brinda humanidad nan serviccionan cu ta aporta na salud di hende.

E tema pa e aña aki ta "Mondi saludabel pa hende saludabel". P'esey riba un dia manera esaki, Directie Natuur en Milieu (DNM) ta encurasha comunidad pa aporta cu plantamento. Asina bo no ta aporta solamente na mas mata pa Aruba y pa mundo, pero bo ta yudando bo mesun salud. Den e relato aki nos ta duna diferente ehempel, unda ta splica con mondi den estado saludabel ta aporta na salud di humanidad. Ademas lo inclui kico nos por haci pa duna mondi un ayudo.

Ta considera mondi como botica natural. Tin mas di 50,000 sorto di mata na mundo cu tin balor medicinal. Den e areanan di mondi salvahe tin comunidadnan chikito cu ta uza e matanan como medicina natural. Pero tambe tin medicina farmaceutico cu ta bini di e matanan di mondi salvahe. Ta uza algun di e matanan pa traha remedi cu ta combati malaria of tambe cancer. Por ehempel, ta uza e medicamento cu ta deriva di e mata periwinckle di Madagascar, cu tin parecido na e famia di e sorto magdalena, pa traha remedi farmaceutico pa tratamento di pashent cu ta sufri di cancer. Localmente, mester bisa cu tin hopi mata cu nos antepasadonan tawata uza pa traha asina yama remed'i tera. Por bisa cu e practicanan aki no a resulta di ta sostenibel ni tampoco a wordo comproba cientificamente. Pero locual ta trata e frutanan manera lamunchi of shimarucu, ta comproba cu nan tin hopi vitamina C, cu sigur ta contribui na nos salud.

Mondi saludabel ta proteha nos contra malesa. Mondin ta sirbi como barera natural pa combati transmision di malesa di bestia pa hende. E riesgo ta bira mas halto pa hende su salud ora cu tin practica di deforestacion na gran escala, cu ta encera rosamento di mondi. A raporta mas di 30% di malesa nobo despues di e añanan 60, cu ta atribui na e cambio di uzo



di suela. Hende a bay mas den desaroyo y a kita mondinan grandi na un manera no sostenibel y asina a sigui desaroya en bes di keda practica plantamento y cria di bestia.

Areanan di mondi ta yuda boost salud mental y salud fisico. Pasa mas tempo den naturalesa ta incrementa emocion positivo, cu ta yuda baha nivel di stress, presion, depresion, cansancio, ansiedad y tension. Palonan di mata den area di ciudad ta absorba gasnan cu ta causa polucion, causa pa trafico y industria. Mata ta sirbi como filtro pa e particularnan chikito manera stof, sushi, huma y asina ta yuda e poblacion urbano preveni malesa respiratorio.

Mondinan salvahe ta un parti central pa combati e menasa di mas grandi pa salud cu humanidad ta confronta, esta cambio di clima. Mondin salvahe den condicion saludabel ta yuda tene e temperatura global na nivel y den balans. Mondin y matanan ta yuda contra temperatura halto y clima extremo, cu ta un reto di salubridad na nivel mundial. Aki por pensa riba heat stroke, calamidadnan cu consecuencia pa un grupo grandi di hende pareu. Locual por haci pa yuda cu e temperatura halto ta haci adaptacion den diseño di cas, incorporando mata. Por ehempel, laga mata grandi na nan luga ora di prepara tereno pa construccion. Mata posiciona na manera adecua rond di edificio ta yuda tene e temperatura y e aire fresco. Tur esakinan ta baha e necesidad di instala airco y asina ta scapa gasto halto di coriente. Nos mondinan ta bou menasa y mester di nos ayudo. E mondinan ta bay perdi na gran escala pa motibo di rosamento.

Continuacion DIA INTERNACIONAL DI MONDI 2023....

Manera menciona, mata y mondi ta yuda humanidad. Hopi biaha no ta para keto y realisa e servicionan cu e mondinan ta brinda nos. Por ehempel, ora cu nos bebe un glas di awa hunto cu e paracetamol, traha un cas, skirbi un buki, casi nunca ta pensa riba e conexion cu esakinan tin cu mondi. Esaki y hopi otro aspecto di bida ta conecta cu mondi salvahe. Pero localmente hopi kier sigui desaroya, traha cas of edificio di negoshi. Inversionistanan ta bini di exterior cu deseo pa traha hotel y edificio sin tene cuenta cu tin regla y ta desea rosa terenonan plat, sin tene cuenta cu porehempel maneho di aanlegvergunning. E daño y desbalansa cu esakinan ta crea tin ora ta irecuperabel. Bestia ta perde nan habitat, cu por ta e matanan of suela. Areanan completamente rosa ta haya temperaturanan mas halto cu normal. Tin ocasion e suela ta degrada y ta ocasiona erosion y/of inundacion. Consecuentemente, pa falta di creatividad y falta di respet pa naturalesa y regla, nos ta haya mas edificio y menos mondi.

DNM ta boga pa un maneho sostenibel di mondi y e uzo sostenibel di nan recursonan. Esaki ta e yabi pa combati cambio di clima. Probablemente asina nos ta aporta na prosperidad y bienestar di e generacion actual y esun cu ta sigui. Nos mondinan tin un rol crucial den alivia pobresa na mundo y asina por alcanza e metanan di desaroyo sostenibel proponi pa Nacionnan Uni pa 2030 (SDG's). Mondinan ta brinda hopi beneficio na salud di hende; ta purifica awa, captura carbon pa combati cambio di clima, ta provee cuminda y yuda cu necesidad di medicina pa salba bida di hende. Asina por wak cu mondinan ta aporta na bienestar general di hende.

Mondinan ta aporta hopi na nos salud, no solamente fisico,

pero tambe mental. E Dia Internacional di Mondin aki DNM ta boga pa no solamente tuma of kita for di mondinan, pero tambe duna bek y aporta na mondinan pasobra mondi saludabel ta trece cune hende saludabel. Ban sigui planta y yuda e matanan cu mester di mas awa pa crece, bonda y produci fruta y berdura, pa asina nan sigui duna tur e otro beneficiannan cu nan ta trece cu nan. Feliz Dia Internacional di Mondin.

HEALTHY FORESTS FOR HEALTHY PEOPLE

dnmaruba.org

21 March International Day of Forests

Uni forsa y cu
positivismo
ta produci
beneficianan grandi
den diferente area pa
famianan, politica,
matrimonio, pais, etc
Hunto nos ta uza e
benificianan aki pa
engrandece nos mes
y Aruba.



2023

AÑA DI UNION Y POSITIVISMO! _____